

**SAMOA****Faatulagaina o Aiaiga**

1. Igoa puupuu ma le amataga
2. Ua faaofiina le fuaiupu 127A fou
3. Aiaiga faasaoina ma aiaiga tau soloaiga

2022, Nu. 2

OSE TULAFONO e teuteu ai le Tulafono o le Ofisa o Tiute 2014
("Tulafono Autu"). *[17 Fepuari 2022]*

UA FAIA e le Fono Aoao Faitulafono a Samoa i totonu o le
Palemene ua potopoto e faapea:

1. Igoa puupuu ma le amataga:

E mafai ona taua leni Tulafono o le Tulafono o Teuteuga o le Tulafono o le Ofisa o Tiute 2022, ma e amata faamamaluina i le aso e tuuina i ai le maliega a le O Le Ao o le Malo.

2. Ua faaofiina le fuaiupu 127A fou:

I le tuanai ai o le fuaiupu 127 o le Tulafono Autu, ia faaofi e faapea:

“Fuaiupu 127A. Tuusaunoaga mai tiute o oloa ua faamaonia e faaulufale mai o se galuega tau atinae ua agavaa:

- (1) I le noatia ma le fai fuafua i le faafuaiupu (2) ma le (3), e mafai ona faamatuu atu tuusaunoaga mai tiute o oloa ua faamaonia e faaulufale mai i totonu o Samoa e faasino i se galuega tau atinae ua agavaa.
- (2) E faatoa mafai ona faamatuu atu tuusaunoaga mo tiute e tusa ai ma taiala faataatitia ua faatonuina i totonu o tulafono faatonutonu.
- (3) E mafai ona faamatuu atu tuusaunoaga mo tiute i se tulaga atoatoa po o i se vaega i ni tulaga ua aliae mai ma noatia i ia tuutuuga ma tapulaa e pei ona

faatonuina ai, e avea o ni tulaga ma tuutuuga ua aliae mai e fesootai i oloa i se tulaga lautele, po o i oloa o lo o aofia ai i se vasega o oloa.

- (4) I totonu o lenei fuaiupu, ae vagana ai ua manaomia e le mataupu se isi uiga e ese ai:

“oloa ua faamaonia” o lona uiga o oloa ua faaaogāina e faasino i se galuega tau atinae ua agavaa lea ua faamaonia ai ia oloa mo faamoemoega o lenei fuaiupu e le Ofisa Sili o Pulega o le Matagaluega o Tupe, ina ia tusa ai ma taiala ua faatonuina i totonu o tulafono faatonutonu;

“galuega tau atinae ua agavaa” o lona uiga o se faletalimalo laitiiti, faletalimalo tetele, faletalimalo tu matafaga ma isi galuega tau atinae o tagata tafafao maimoa mai, galuega tau atinae o oloa gaosi, oloa tau faatoaga, galuega tau atinae tau faiga faiva po o isi galuega tau atinae ua faamaonia e le Minisita o Tupe, i le faia i luga o le

fautuaga a le Kapeneta e tusa ai ma taiala faataatitia ua faatonuina i totonu o tulafono faatonutonu.”.

3. Aiaiga faasaoina ma aiaiga tau soloaiga:

- (1) O so o se faaiuga na faamaonia e le Minisita o Tupe e amata mai i le tausaga 2014 na faia i luga o le fautuaga a le Kapeneta (e ala i fautuaga a le Komiti o Tupe Teufaafaigaluega) mo le faamatuuina atu o tuusaunoaga mo tiute o oloa ua faamaonia mo se galuega tau atinae ua agavaa, e aloaia e faapei ai na faia i lalo o lenei Tulafono.
- (2) O so o se tuusaunoaga mo tiute na faamatuu atu mo oloa ua faamaonia o se galuega tau atinae ua agavaa a o lumanai ai le faamamaluina o lenei Tulafono, e faaauau pea ona aloaia e faapei ai na faia i lalo o lenei Tulafono.

O le Tulafono o Teuteuga o le Tulafono o le Ofisa o Tiute 2022 o lo o faafoeina e le Matagaluega o Tiute ma Tupe Maua.

**Lolomiina e le Failautusi o le Fono Aoa o Faitulafono,
i le pule a le Fono Aoa o Faitulafono.**